



Bishita di su Mahestad La Reina Beatrix na 1981

semper pa tin momentonan liber pa su famia.

Su hogar tabata e base solido pa cualquier reto cu e mester a enfrenta. Apesar di e poco tempo, el a siña su famia pa compronde y sostene den su lucha. Y e comprension y apoyo aki a duna Betico tur libertad di por sigui tranquilamente en busca di e formula valioso y exitoso pa por logra e Status Aparte pa su pueblo. Y durante e ultimo homenaje na su honor, el a convoca esaki.

E tabata un tata ehemplar. El a siña su yiunan e balornan y principionan di bida.

El a percura pa su yiunan, mescos pa tur yiunan di tera, tambe por goza di un bon educacion. Y su balornan propio el a traspasa pa nan. Pa Betico tabata primordial: Stima bo prohimo sin distincion di raza, color politico o religion. El a siñanan e balor di un amor berdadero pa nan pais.

El a siña tur hende kico kiermeen ta un Arubiano.

Pero Betico a considera su mes un tata particular.

Pakico? E portanan di su hogar el a habri pa su pueblo. El a convivi cu su pueblo den bon, den malo, den tristeza y alegria. Su famia a bira un solo pueblo.

Manera Betico no tin mas. Esnan cu tabata tin e honor di a conoce personalmente awe mi ta sigur ta comparti e mesun opinion. Pakico un honor? Paso Betico a marca historia. Di un homber simpel y humilde a nace un luchador incansable cu a culmina e deseo di e pueblo di Aruba den un lucha valioso y sagrado cu despues a conduci su pueblo na logra e tan anhela Status Aparte.

Di un homber simpel, el a bira un orador admira, un luchador stima, un estadista respeta, e libertador di Aruba. E simpleza y sinceridad di Betico a bira su grandeza. Awe mas cu nunca nos por bisa cu Betico a bin na mundo pa logra e libertad di Aruba pa despues e bay laga nos.

Nos como pueblo di Aruba ta orguyoso di nos yiu di tera. Nos ta orguyoso como nacion di a wordo honra cu un gran


luchador. Nos ta orguyoso como pais di a wordo bendiciona cu un libertador, nos tan stima Betico Croes.

Nos no mester acepta pa e historia di Aruba wordo troci. Trociendo nos historia nos lo ta traicionando nos origen, nos raiz, nos nacion. Pero mas aun nos lo traiciona e lucha y sacrificio di Betico y su pueblo. Historia ta e base, e fundeshi di un nacion. Historia di un pais ta algo sagrado cu mester wordo respeta y proteha como tal.


Awe ariba natalicio di Betico nos ta recorde y añore cu inmensa gratitud. Nos ta roga na Señor pa su alma encontra e divino luz pa e por tin e paz tan mereci.

Den año 1996 Aruba cu sentimentonan mixto di orguyo y nostalgia ta recorda su yiu di tera, nos conciudadano. E libertador di Aruba Betico Croes.


Guisette F. Croes
Fundacion Libertador
Betico Croes



Aña 1981 den Staten na Hulanda



Yegada for di Hulanda despues di a firma nos Status Aparte



18 Juni 1985 den Eerste Kamer na Hulanda



Bishita di G.F. Croes cerca Presidente di Venezuela Herrera Campins